



Broj: 11-04/02-34-5780-2/26

Sarajevo, 23.02.2026. godine

Na osnovu čl. 70. Zakona o organizaciji organa uprave u Federaciji Bosne i Hercegovine („Službene novine Federacije BiH“, broj: 35/05), čl. 4 i 19. Zakona o izvršavanju Budžeta Kantona Sarajevo za 2026. godinu („Službene novine Kantona Sarajevo“, broj: 52/25) i člana 4. Odluke o uslovima, postupku i kriterijima za dodjelu stipendija talentovanim/nadarenim učenicima prvog razreda srednje škole kao javne ustanove na području Kantona Sarajevo u školskoj 2025/2026. godini, ministrica za odgoj i obrazovanje raspisuje

## **JAVNIPOZIV**

### **za dodjelu stipendija talentovanim/nadarenim učenicima prvog razreda srednje škole kao javne ustanove na području Kantona Sarajevo u školskoj 2025/2026. godini**

Javni poziv za dodjelu stipendija za talentovane/nadarene učenike koji se upisuju u prvi razred srednje škole kao javne ustanove u Kantonu Sarajevo u školskoj 2025/2026. godini ostaje otvoren 7 dana od dana objavljivanja Javnog poziva na internet stranici Ministarstva za odgoj i obrazovanje Kantona Sarajevo.

### **Član 1**

#### **(Izbor kandidata)**

- (1) Izbor kandidata za stipendiranje vrši se u skladu sa Odlukom o uslovima, postupku i kriterijima za dodjelu stipendija talentovanim/nadarenim učenicima prvog razreda srednje škole kao javne ustanove na području Kantona Sarajevo u školskoj 2025/2026. godini.
- (2) Prijavu na Javni poziv roditelji, zakonski staratelji zainteresovanih učenika mogu podnijeti školi u kojoj je učenik upisan u prvi razred u roku od 7 dana od dana objavljivanja Javnog poziva.

- (3) Proceduru provjere formalno-pravne urednosti prijava i izbor kandidata koji ispunjavaju uslove za dodjelu stipendije provodi Komisija koju imenuje direktor srednje škole. Komisija je obavezna usvojiti poslovnik o radu i voditi zapisnik o održanim sastancima/sjednicama u koji se unose svi podaci kojima se dokazuje ispunjenost uslova za dodjelu stipendije. Komisija za svoj rad odgovara direktoru škole.
- (4) Komisija je obavezna u roku od 7 dana od dana isteka roka za predaju prijave na Javni poziv sačiniti listu prijavljenih kandidata koji su aplicirali na Javni poziv i koji ispunjavaju odnosno ne ispunjavaju kriterije za dodjelu stipendije i istu, sa prijavama kandidata, dostaviti direktoru škole.
- (5) Komisija će Listu učenika koji ispunjavaju uslove za dodjelu stipendije objaviti na oglasnoj ploči i web-stranici škole nakon isteka roka iz stava (4) ovog člana.
- (6) Direktor je obavezan Listu kandidata sa kompletnom dokumentacijom koja obuhvata dokumentaciju nastalu u radu Komisije i prijave kandidata, dostaviti Ministarstvu za odgoj i obrazovanje najkasnije u roku od tri dana od dana zaprimanja iste.

## **Član 2**

### **(Utvrđivanje prilimtarne i konačne liste dobitnika stipendija)**

- (1) Ministrica za odgoj i obrazovanje imenuje Komisiju za razmatranje Liste prijavljenih kandidata i pregled dokumentacije iz člana (6) ove Odluke.
- (2) Komisija je obavezna izvršiti pregled formalno-pravne urednosti zaprimljenih prijave i utvrditi da li prijavljeni kandidati ispunjavaju uslove za ostvarivanje prava na dodjelu stipendije.
- (3) Komisija iz prethodnog stava za svoj rad odgovara ministrici.
- (4) Nakon što izvrši poslove iz prethodnog stava, Komisija utvrđuje preliminarnu listu dobitnika stipendije koju objavljuje na web stranici Ministarstva za odgoj i obrazovanje.
- (5) Na preliminarnu listu podnosioci prijave na Javni poziv imaju pravo prigovora u roku od 7 dana od dana objavljivanja Prelimtarne liste.
- (6) Prigovor se podnosi ministrici za odgoj i obrazovanje koja je obavezan u roku od 3 dana od dana zaprimanja prigovora donijeti odluku o prigovoru.
- (7) Nakon donošenja odluke o izjavljenim prigovorima ministrica za odgoj i obrazovanje donosi odluku kojom utvrđuje konačnu listu dobitnika stipendija.

## **Član 3**

### **(Uslovi i kriteriji za dodjelu stipendija)**

- (1) Pravo na stipendiju mogu ostvariti učenici koji ispunjavaju sljedeće uslove:
  - a) da je državljanin Bosne i Hercegovine;



- b) da je redovni učenik srednje škole kao javne ustanove koji prvi put upisuje prvi razred u školskoj 2025/2026. godini,
- c) da je osnovnu školu završio sa prosjekom 5,00 i primjerenim vladanjem (od 6. do 9. razreda)
- d) da je dobitnik nagrade za ostvareno prvo mjesto na kantonalnom, federalnom, državnom i međunarodnom takmičenju iz nastavnih predmeta: matematika, informatika i fizika.

(2) Ispunjenost uslova iz stava (1) ovog člana dokazuje na sljedeći način:

- ispunjenost uslova pod a) dokazuje se dostavljanjem uvjerenja o državljanstvu (orginal ili ovjerena fotokopija koja ne može biti starija od 6 mjeseci od dana objave Javnog poziva);
- ispunjenost uslova pod b) provjerava i utvrđuje školska komisija provjerom kroz EMIS sistem. Ispunjenost uslova školska komisija zapisnički konstatuje tako što navodi datum izvršene provjere i utvrđeno činjenično stanje. Komisija Ministarstva zadržava pravo da izvrši provjeru podataka učenika kroz EMIS informacioni sistem;
- ispunjenost uslova pod c) provjerava i utvrđuje školska komisija provjerom dokumentacije iz personalnog dosijea učenika. Ispunjenost uslova školska komisija zapisnički konstatuje tako što navodi datum izvršene provjere, broj i datum svjedodžbe učenika na osnovu koje je utvrđena ispunjenost uslova. Komisija Ministarstva zadržava pravo da izvrši provjeru podataka učenika kroz EMIS informacioni sistem.
- ispunjenost uslova pod d) provjerava i utvrđuje školska komisija provjerom dokumentacije iz personalnog dosijea učenika. Ispunjenost uslova školska komisija zapisnički konstatuje tako što navodi datum izvršene provjere, broj i datum potvrde/uvjerenja/diplome ili drugog akta na osnovu koje se dokazuje ispunjenost ovog uslova, kao i naziv institucije koja je izdala potvrdu/uvjerenju/diplomu ili drugi akt. Komisija Ministarstva zadržava pravo da izvrši provjeru podataka učenika kroz EMIS informacioni sistem.

#### **Član 4.**

##### **(Prednost kod izbora)**

U slučaju da dva ili više kandidata imaju jednake uvjete za stipendiju, prednost će se dati kategorijama lica naznačenih u Zakonu o dopunskim pravima boraca Federacije Bosne i Hercegovine.

#### **Član 5.**

##### **(Iznos stipendije)**

(1) Precizan iznos stipendije utvrđuje ministrica posebnom odlukom, a isti će zavisi o raspoloživim finansijskim sredstvima u Budžetu Kantona Sarajevo.



Adresa: Reisa Džemaludina Čauševića 1, 71 000 Sarajevo

Tel: + 387 (0) 33 562-128

Web: <http://mo.ks.gov.ba>, E-mail: [mo@mo.ks.gov.ba](mailto:mo@mo.ks.gov.ba)

- (2) Ukoliko učenik, dobitnik stipendije naknadno bude upisan u srednju školu kao privatnu ustanovu, dužan je vratiti dodijeljenu stipendiju.

## Član 6

### (Pravo na stipendiju)

- (1) Pravo na stipendiju kandidat ne može ostvariti ukoliko je već ostvario pravo na stipendiju od Javnog sektora (Općine, Grada, Kantona, FBiH, BiH, fondova, ministarstava i javnih preduzeća).
- (2) Stipendija se dodjeljuje nakon provedenog postupka, a na osnovu kriterija propisanih ovom odlukom.

## Član 7.

### (Isplata stipendije)

Stipendije se isplaćuju odjednom ili u ratama, ovisno od priliva sredstava u Budžet Kantona Sarajevo.

